

求恕齋
叢書

蕉廊脞錄

三

蕉廊脞錄卷五

錢塘吳慶坻撰

吳興劉承幹校

永樂大典二萬二千八百七十七卷凡例目錄六卷

邵位

西先生所記同凡一萬二千冊

冊數與明史異

向貯乾清宮其副本

在皇史宬後因恭藏聖祖仁皇帝實錄乃移貯

翰林院李穆堂侍郎始借觀而副本闕二千四百二十

二卷擬奏請發宮中正本鈔補之未果嘉慶丁巳乾清

宮災正本燬其存儲翰林院者虔敬一亭無人過問咸

豐庚申之變書漸亡失光緒元年重修翰林院虔置此

書不及五千冊矣明年丙子繆小珊入詞館詢之清秘堂云尙存三千餘冊求借觀不可得丙戌志文貞銳官侍讀入清秘堂辦事小珊始得借鈔人間稀有之本癸巳小珊重入京師詢之館人則僅六百餘冊矣庚子巨劫翰林院牙門闌入使館藏書星散大典僅存三百餘冊宣統元年學部請以歸圖書館藝風堂文集言之最詳按全謝山入詞館與穆堂共借永樂大典讀之大典共二萬二千七百七十七卷見鮎埼亭集卷數小異余家藏笠澤叢書爲後至元五年十一世孫惠原刊於書院不分卷以甲乙丙丁爲次後一卷補遺書法類趙

松雪紙墨精良有輔國公如膏印怡情書室圖書素心
人怡情書室珍藏書畫圖章信郡王恬齋素心人珍藏
信邸珍藏諸小印據邵位西先生書目云此書有宋蜀
刻本十二行行二十一字又明李如楨校刊本碧筠草
堂仿元刊本吳人王岐所寫不無訛字嘉慶間許槿仿元刊本七卷
又云錢遵王云宋刊本祇上下二卷又補遺一卷元刊
乃分四卷余家所藏至元刊本正分爲四卷與讀書敏
求記合惟邵目云書院本有三山王益祥跋而此本無
之

司馬溫公年譜近所見者桂林陳文恭公刻本已酉三

月在長沙從劉笏雲借閱所藏明刊溫公年譜六卷嘉靖壬辰涑水馬巒編輯溫公十八世孫露校刻馬巒序闕前半首露跋云公曾孫吏部侍郎伋扈蹕南遷子孫因家浙之紹興山陰露王父按察使相巴陵尹初皆起家進士堅有還夏之志賁志而歿露父解元晰來夏奉祀云云是溫公後人固嘗居浙復乃復歸夏邑也

仁和邵位西先生博極羣書嘗就所見諸家藏書記錄於四庫全書簡明目錄冊端蠅頭細書上下皆徧咸豐間爲瑞安項凡山

傅霖

借鈔辛酉先生殉節書存項氏

同治己巳先生之子子俊

順年

在江甯介孫中頌言於

項氏得索歸別寫副本流傳都下祥符周季貺

星詒吳

縣王芾卿

頌蔚

武進董綬金

康

山陰胡右階

念修

皆有

遙鈔之本光緒癸卯先生之孫伯綱

章

游吳門見胡氏

鈔本乃更貽書中頌商定體例繕校付刊壬子之春蟄

居海上從伯綱借觀復爲校勘新鈔之本而月而後卒

業茫茫浩劫古籍將湮抱此遺編如游宛委蕭寒寂寞

中亦假以送日耳

宋李壁撰王荆公詩注五十卷有劉辰翁評點者乾隆

辛酉海鹽張宗松清綺齋校刻本最精邵位西先生藏

元刊本卽張氏所仿刻者中闕第三十第十卷末頁劫

後爲錢塘丁氏所得復以歸邵余與伯綱同寓滬北得見此本前有位西先生長跋詳述是書流傳端緒適清綺後人張菊生得元大德辛丑刊本前有詹太和撰荆公年譜及劉歸孫序王常題識皆乾隆重刻本所無全帙完好古香可挹書中有季滄葦印記後輾轉歸豐潤張氏者菊生先後得乾隆刻本至五六冊今復得此誠奇緣也位西先生跋一通附錄于後 謹按乾隆間

欽定天祿琳琅書目後編元板類云王荆文公詩二函二十冊宋王安石撰李壁注劉辰翁批點壁字季章號雁湖登進士累官禮部尙書參知政事同知樞密院事

謚文懿事具宋史本傳辰翁字會孟號須溪廬陵人少
舉進士宋末不仕書五十卷前有劉歸孫序卽辰翁之
子也又詹太和所箸王荆文公年譜目錄後有墨記僕
頃問詩於須溪先生及半山則恨李注本極少於是先
生出示善本併得其評點茲不敢私命刻之梓期與四
方學者共之門人王常謹題常字士吉安成人蓋大德
辛丑所刻而歸孫序之太和字甄老桐廬人每冊首有
白文謙牧堂藏書記末有朱文謙牧堂書畫記俱橫長
印又按乾隆六年辛酉武原張宗松重刊王荆文公詩
序云十年前購得華山馬氏所藏元刻本間取通行臨

川集勘之篇目既多寡不同題字亦增損互異乃歎是書之善不獨援據該洽可號王氏功臣也史稱季章嗜學如飢渴今雁湖集不存他著錄亦盡逸惟是書見稱藝林而流傳絕少因重鋟以廣其傳又曰李氏之注王詩猶施氏之注蘇詩任氏之注黃陳二家詩也山谷後山詩注尙有前明雕板東坡詩注則宋漫堂先生獲宋槧不全本補綴刊行今遂家有其書矣獨是書絕無僅有近代藏書家若絳雲若傳是俱不列其目華山馬氏至晚始得之故道古樓書目亦未之載衍齋沒後復隨雲煙飄蕩流轉數姓歸予插架又曰是書首尾完好惟

卷端失去魏鶴山序一篇第三十卷第五十卷失去兩
末頁又曰須溪評點雜亂注中觀者目眩今芟去使李
注孤行更覺心目開朗又乾隆四十一年丙申張載華
識云先兄青在每以失去鶴山序爲恨訪求不得宗人
芑堂好古士也客冬於武林鮑氏知不足齋錄以貽子
爰屬延一姪補刻卷端又張燕昌識云乾隆乙未冬十
一月二十三曰余於杭城好友鮑以文知不足齋鐫下
得觀李雁湖注王荆文公詩宋槧不全本一卷之三卷
十五之十八卷二十三之二十六卷二十七之二十九
卷四十之四十七凡十七卷目分上中下每卷尾有庚

寅增注前後有晉府書畫之印及李氏德圭諸印吾宗
青在先生曾得馬氏藏本付梓以不得魏序爲恨今鮑
氏宋本有之亟錄以俟補入并詳所見卷帙冀好古者
廣其傳焉今按張青在刻本所自出卽此本也第三十
卷五十卷尾缺頁正同而書中間有夾籤乃刪薤須溪
評點而設所云得之華山馬氏此書印記乃吾鄉沈椒
園先生所藏豈流轉數姓而馬氏晚始得之不復加圖
印歟道光己酉余得之琉璃廠文華堂書肆先有張君
重刻本重鄉先輩椒園先生故物且須溪評點亦自有
意致乃以八金易置案頭頃讀天祿琳琅後目知 內

府尙有完全元槧本前有詹太和王荆文公年譜張青
在重刻序例恨荆公獨無年譜姑取宋史本傳刻附卷
首不知原書自附年譜也又有劉歸孫序及王常題識
刻書年月張君但據陳直齋解題恨不得魏鶴山序文
不知魏序作於嘉定七年季章門人李西美醇儒初刻
是書之時宋本有之元本未必重載也謙牧堂乃大學
士揆敘家印記揆敘乃明珠之子刻通志堂經解之成
德其兄也咸豐元年六月二十日辰記

漳浦黃忠端公書孝經卷冊各一忠端夫人蔡氏所書
孝經卷一漢陽葉氏所藏忠端自跋一爲辛巳秋一爲

辛巳八月皆請室中筆墨也

冊舊藏亳州何氏忠端自題曰第二十九本有跋語

五條卷舊藏元和毛氏有忠端自跋一彭紹升所作頌一

按忠端公孝經別本自跋

云嚮在西庫寫此經一百二十本其七本有補幽風

席人

章末引詩云我稼既同上入執宮功畫爾于茅宵爾索綯亟其乘屋其始播百穀

餘八十本俱

依石臺原本又三十三本以聿修厥德移於天子之首

西庫無佳筆俱用禿筆書之云云葉氏所藏殆卽其時

所書蔡夫人善臨池代公作行草幾奪真孝經卷題崇

禎甲申秋望日偶錄蓋臨忠端書葉氏又云夫人書孝

經別一卷末題明忠烈文明伯武英殿大學士黃道周

妻蔡氏玉卿書於石養山中之齋室凡二十九字

先生嘗爲

夫人易名孝徽不著年月忠烈諡隆武所贈此卷當是丙戌後

作忠端嘗進孝經大傳其序云臣繹孝經微義有五著義十二是十七者以治天下選士不與焉而士出其中蓋深痛于楊嗣昌陳新皆奪情而起無父無君之言滿天下乃退述是經以補講筵之闕崇禎庚辰被逮白雲庫下諸獄卒不敢有望于公惟日奉楮札丐書時公拷掠備至血肉淋漓日據敗几書孝經以當役錢而已忠端孝經定本善化賀耦庚先生嘗刊於黔中余家有是本幼童入塾卽以是本課之

忠端屢上疏言自古迄今決無數米量薪可成遠大之

猷吹毛數睫可奏三五之治者又云自古外患未弭則大臣一心以憂外患小人未退則大臣一心以憂小人今獨以遺君父而大臣自處於催科比較之末行事而事失則曰事不可爲用人而人失則曰人不足用此數語自來亡國之臣皆蹈此轍可勝歎哉

倪文正公元璐手稿四冊前二冊皆疏稿大氏爲戶部尙書時事論兵餉漕糧開採鈔幣鹽務車戶凡九首格式與本朝奏摺略同書牘三通詩文一百十首中多涂乙舊臧紹興陳氏留古齋今爲日本長尾甲雨山所得余從張菊生轉假讀之忠貞遺墨留天地間二百七十

年乃爲東人所獲惜哉按四庫書目倪文正集十七卷
續編三卷奏疏十二卷講編四卷詩集四卷文淵閣著
錄其詩又收入乾坤正氣集別有鴻寶應本十七卷今
有傳本又公門人唐九經嘗梓公遺詩未見

甲申傳信錄鈔本四冊當湖穉農錢顥撰凡十卷每卷

以四字標目卷一曰睿謨留憾癸未八月至甲申三月卷二曰疆

場裹革秦晉燕死難諸臣卷三曰大行驂乘甲申三月在卷四

曰跖舖餘纓李闖拷掠諸臣卷五曰槐國衣冠李闖除授京省僞官卷六

曰赤眉寇略李闖始末卷七曰董狐刺筴甲申前後楚豫燕齊事略卷八

曰桑郭餘鈴吳三桂借兵復仇始末卷九曰戾園疑跡偽太子始末卷

十曰使臣碧血

左懋第北使殉節始末

自敘云一時人士所紀述

者有國變錄甲申紀聞國難紀聞見聞紀略國難睹記變難確傳燕都日記陳生再生錄孤臣紀哭陳方策揭凡十餘家今諸書傳本不恆見蓋遺佚者多矣

魯春秋不著撰人姓名記魯王監國時事其監國紀有云宏光元年乙酉夏五月南京不守江南及浙西郡咸望風下杭諸紳奉皇太后命敦請潞王翊鏐監國甫三日因原任都督陳洪範籍士馬錢糧北款錢塘知縣顧咸建不從棄去諸生沈乘建守城之策百姓暱王慈立殺乘原任兵部主事王道焜行人司行人陸培不應召